

«Main taglia per il mastergn»

La cumissiu dal cussegl grond recumonda da refusar l'iniziativa

■ **(cc) La cumissiu dal cussegl grond per economia e taxas ha predeliberà la missiva da la regenza tar l'iniziativa chantunala dal pievel «Main taglia per il mastergn». Ella sustegna las propostas da la regenza e refusa uschia l'iniziativa. Medemamain desista la cumissiu d'ina cuntraposta. Il cussegl grond vegn a tractar questa fatschenta en la sessiu d'october 2013.**

L'iniziativa chantunala dal pievel «Main taglia per il mastergn» vul che las persunas giuridicas na stoppian betg pli pajarin taglia da cultus. En sia missiva propona la regenza da refusar l'iniziativa. La cumissiu per economia e taxas ha acceptà unanimamain questa opiniun. Tenor la cumissiu predeliberanta vegniss la gron-

da maiortad da las persunas giuridicas distgargiada mo marginalmain, per las baselgias chantunalas resultassan percutenter perditas finanzialas drasticass. In'aboliziun da la taglia da cultus avess per consequenza che circa in terz da las entradas crudass davent tar la baselgia chantunala evangelica. Tar la baselgia chantunala catolica fiss quai schizunt passa 90 pertschient da las entradas. Ina gronda part da las purschidas da la baselgia che vegnan offeridas ordaifer il sectur da cultus na pudess uschia betg pli vegnir finanzada. Qua sa tracti da purschidas e da prestaziuns socialas, caritativas e culturalas che las duas baselgias furneschon a favur da la populaziun grischuna. Per la cumissiu han questas prestaziuns dapli im-

purtanza che l'interess d'abolir la taglia da cultus. E cuntrari a quai ch'il titel da l'iniziativa lascha parair na profitass dal rest betg l'entir mastergn da l'aboliziun, mabain mo las persunas giuridicas (societads anonimas, societads cun responsabladad limitada). La maiortad da las mastergnantas e dals mastergnants en persunas cun activitad da gudogn independenta en furma d'interpresas singulas u d'interpresas da persunas e n'èn pia betg pertutgadas da l'iniziativa. En quest connex crititgescha la cumissiu er ch'il titel tscherni da las iniziantas e dals iniziantes e ch'il text da l'iniziativa n'hajan betg la clerezza giavischada. Perquai che la procedura è gia en in stadi avanzà e sin basa dal princip «En cas da dubi per l'iniziativa» ha la cu-

missiu dentant renunzià da proponer al cussegl grond da declerar l'iniziativa sco nunvalaivla. La cumissiu è dentant da l'avis ch'ins stoppia pretender da las iniziantas e dals iniziantes en l'avegnir iniziativas cun in titel e cun in cuntegn pli cler e pli evident.

Plinavant ha la cumissiu pudì sa persvader da desister d'ina cuntraposta. Alternativas sco ina taglia da mandats, destinaziuns fixas u cunvegnas da prestaziun avessan dischavantatgs considerabels envers il sistem actual, chaschunassan fitg blera lavur e na fissan gnanc realisablas entaifer il termin che l'iniziativa sto vegnir tractada.

Il cussegl grond vegn a tractar l'iniziativa en la sessiu d'october 2013.